

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KE-14**

**PERTANYAAN : LISAN**  
**DARIPADA : YB DATO' DR. MOHD KHAIRUDDIN BIN  
AMAN RAZALI [KUALA NERUS]**  
**TARIKH : 15 NOVEMBER 2021 (ISNIN)**

**SOALAN**

**DATO' DR. MOHD KHAIRUDDIN BIN AMAN RAZALI [KUALA NERUS]** minta **MENTERI KEWANGAN** menyatakan perancangan jangka masa panjang Kementerian dalam menyediakan suatu tabungan yang stabil dan lestari untuk menunaikan komitmen bayaran emolumen setiap tahun memandangkan kedudukan fiskal negara pada ketika ini berada dalam keadaan yang kritikal.

**JAWAPAN**

Tan Sri Yang di-Pertua,

1. Untuk makluman ahli Yang Berhormat, emolumen bagi penjawat awam diperuntukkan di bawah belanja mengurus Kerajaan Persekutuan yang dibiayai melalui Akaun Hasil Disatukan. Sumber bagi Akaun Hasil Disatukan ini kebanyakannya adalah menerusi kutipan hasil tahunan, yang disumbang terutamanya oleh hasil cukai Kerajaan. Oleh yang demikian, sebagaimana yang termaktub dalam Perlembagaan Kerajaan Persekutuan, kesemua perbelanjaan mengurus (atau OE) harus dibiayai dengan hasil, dan tidak boleh dibiayai dengan pinjaman.

2. Kerajaan amat peka dan proaktif dalam memastikan hasil yang mampan dalam jangka masa pendek dan panjang. Dalam hal ini, bagi memastikan kutipan hasil yang mencukupi untuk menampung perbelanjaan mengurus, maka Kerajaan perlu melaksanakan strategi meningkatkan hasil serta strategi mengawal perbelanjaan Kerajaan.

Tan Sri Yang di-Pertua,

3. Dalam memperluaskan hasil Kerajaan, dan sebagai tambahan kepada unjuran hasil melalui kutipan cukai dan bukan cukai yang berjumlah 234 bilion ringgit, atau 14.3 peratus kepada KDNK untuk tahun 2022, Bajet 2022 juga telah mengumumkan langkah cukai seperti:

- a. pengenaan cukai pendapatan kepada pemastautin di Malaysia ke atas pendapatan yang terbit daripada sumber di luar negara dan diterima di Malaysia mulai 1 Januari 2022;
- b. pengenaan duti eksais terhadap produk cecair atau gel mengandungi nikotin yang digunakan dalam rokok elektronik dan vape;
- c. peluasan pengenaan duti eksais ke atas produk minuman bergula;

- d. pelaksanaan nombor pengenalan cukai (atau TIN) bagi memperluaskan asas cukai pendapatan;
- e. memperkenalkan Cukai Makmur secara *one-off* kepada syarikat selain Perusahaan Mikro, Kecil dan Sederhana (atau PMKS) yang menjana keuntungan sebelum cukai melebihi 100 juta ringgit bagi tahun kewangan 2022; dan
- f. pengenalan Program Khas Pengakuan Sukarela Jabatan Kastam Diraja Malaysia secara berfasa.

4. Melalui langkah-langkah ini, dijangka hampir 6.18 bilion ringgit dari segi cukai tambahan akan disumbang kepada hasil Kerajaan Persekutuan.

5. Selain itu, seperti yang diumumkan semasa pembentangan Bajet 2022, Kerajaan akan membentangkan Akta Tanggungjawab Fiskal pada 2022 di Dewan Yang Mulia ini dengan tujuan untuk meningkatkan tadbir urus, akauntabiliti dan ketelusan dalam pengurusan fiskal negara bagi memastikan kemampanan fiskal dan menyokong kestabilan ekonomi makro. Ini juga akan melihat pelaksanaan Strategi Hasil Jangka Sederhana, atau dengan izin, *Medium Term Revenue Strategy (MTRS)* untuk mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan. Inisiatif daripada *MTRS* dijangka akan meningkatkan kutipan hasil Kerajaan Persekutuan serta merancakkan ekonomi negara dalam jangka sederhana.

6. Tambahan lagi, Kerajaan juga sedang melaksanakan Semakan Perbelanjaan Awam, atau dengan izin, *Public Expenditure Review* dengan kerjasama Bank Dunia bagi memastikan kecekapan dan keberkesanan perbelanjaan awam tanpa menjejaskan sistem penyampaian awam. Ini akan meningkatkan produktiviti perbelanjaan

awam bagi memastikan nilai faedah terbaik bagi setiap ringgit cukai yang dibayar oleh rakyat.

Tan Sri Yang di-Pertua,

7. Selain langkah peningkatan hasil, Kerajaan juga akan terus memantau peningkatan perbelanjaan mengurus, termasuklah emolumen agar mengambil kira ruang fiskal yang terhad.

8. Bagi memastikan Kerajaan terus mampu untuk membiayai komitmen bayaran emolumen yang dianggar mencatat 86.5 bilion ringgit pada tahun 2022, rasionalisasi perbelanjaan serta semakan dasar sedia ada akan sentiasa dilaksanakan berdasarkan keutamaan perbelanjaan, seiring dengan prestasi kutipan hasil tahunan.

9. Kerajaan juga akan sentiasa memastikan saiz penjawat awam berada pada had yang optimum bagi mengawal perbelanjaan ini. Di samping itu, Kerajaan turut mengkaji dan menyemak dasar sedia ada bagi perbelanjaan lain, seperti bayaran persaraan, dan subsidi, bagi memastikan ia tidak memberi beban jangka masa panjang ke atas kedudukan kewangan Kerajaan Persekutuan.

10. Pada masa yang sama, bagi memperkukuh kedudukan fiskal, Kerajaan mengguna pakai Rangka Kerja Fiskal Jangka Sederhana, atau dengan izin, *Medium Term Fiscal Framework (MTFF)* sebagai panduan dalam menggubal strategi ke arah konsolidasi fiskal jangka sederhana yang selari dengan pelan pembangunan Rancangan Malaysia Kedua Belas. Perancangan jangka sederhana ini penting bagi memastikan Kerajaan mempunyai ruang fiskal yang selesa dan mencukupi untuk melaksanakan program pembangunan dan langkah kitaran balas dalam menangani situasi luar jangka pada masa hadapan, sekiranya diperlukan.

Sekian, terima kasih.